

CELEBRACIÓN EN OS COTOS (na igrexa)

15 - 16 de xaneiro do 2022

II DOMINGO DO TEMPO ORDINARIO



OS COTOS COA IGUALDADE VERDADEIRA DAS PERSOAS,
COS POBOS QUE SOFREN INXUSTIZA E ABANDONO,
COS REFUXIADOS E MARXINADOS DA SOCIEDADE,
COA NATUREZA MALTRATADA
E CON RESPONSABILIDADE PERSOAL ANTE A COVID-19



1.- ENCONTRO DA COMUNIDADE SAÚDO DE BENVIDA

🎵 *nº 4 Amigos nas penas*

Celebrante:

Benvidos sexamos todos a esta celebración. Reunímonos para compartir en comunidade a nosa fe no nome do Pai, do Fillo e do Espírito Santo.

Deixamos atrás os días do Nadal e volvemos na liturxia ao tempo ordinario. Agora é o tempo de poñer en práctica todo o vivido con Deus Neno: as ilusións, os propósitos, os proxectos para este ano.

No evanxeo de hoxe atopamos á nai María sendo exemplo para nós. Ela está atenta ás necesidades dos demais, representados nuns noivos, e comprende a súa situación polo que busca solucións na persoa de Xesús. Este vai transformar a auga da tristura, da soidade, da incompreensión, de calumnias, de desprezo... en viño novo de comprensión, de diálogo, de paz e de alegría.

Coma comunidade de Os Cotos queremos neste ano seguir amosando a nosa solidariedade con todos os refuxiados. Queremos ser para eles “igreja de esperanza e compromiso” co que nos dá Xesús.

Estámolo xa sendo cos algo máis de 3.000 euros recaudados para entregar a Cáritas de A Palma. Grazas.

ACTO PENITENCIAL

Celebrante: *Na vida de cada día, con demasiada facilidade nos deixamos levar polas desesperanzas, e parécenos que nada podemos facer, por iso imos agora pedir perdón.*

Monitor/a:

- Porque moitas veces afogamos a vida nas augas da tristura, da soidade, das aparencias. Señor, dános a túa felicidade
- Porque moitas veces cremos que no mundo nada se pode cambiar, que non temos nada que facer, que non contamos para nada. Cristo, dános a túa felicidade
- Porque moitas veces o único que facemos é queixarnos en vez de preocuparnos e dar unha man a quen a necesita. Señor, dános a túa felicidade

Celebrante: *Deus todopoderoso teña piedade de nós, dos que teñen un lugar na nosa vida, de todos os que sofren e están desesperados. A todos nos conceda o perdón dos pecados e nos leve á vida eterna. Amén.*

ORACIÓN PROPIA DO DÍA

Celebrante: *Rematamos a primeira parte da celebración presentando no silencio o que rebule no noso interior; damos grazas polas persoas que están atentas e preocupadas polos demais.*

(silenzo)

Celebrante:

Deus, Noso Pai,
cheo de tenrura e misericordia,
ti que te achegas a nós,
escoita con bondade as súplicas do teu pobo
e axúdanos a medrar na paz do teu Fillo Xesús.
Pedímoscho por El, Xesucristo, noso irmán,
que vive e reina por sempre eternamente. Amén.

2.- PROCLAMACIÓN DA PALABRA DE DEUS

(sentad@s) a palabra de Deus proclámase dende o ambón

Celebrante: *Dispoñémonos agora a escoitar a Palabra de Deus que hoxe nos di que para axudar todos somos necesarios, todas as mans son boas. As de María e as de Xesús leváronos a axudar a unha parella de recién casados. As nosas tamén serven.*

Leccionario I C páx 172 1 Cor 12, 4-11 LECTURA

LECTURA DA CARTA DE PAULO AOS CORINTIOS

Irmáns e irmás:

Hai diversidade de dons, pero un mesmo Espírito. Hai diversidade de servizos, pero un mesmo Señor. Hai diversidade de realizacións, pero un mesmo Deus, que é quen realiza todo en todos.

A cadaquén dáselle a manifestación do Espírito para o ben común. A un o Espírito dálle palabra de sabedoría; a outro dálle palabra de ciencia o mesmo Espírito; a aquel outro o mesmo Espírito concédelle fe. A un este mesmo Espírito dálle o don de curacións; a outro, o don de facer milagres; a outro, o don da profecía; a outro, discernimento de espíritos. A un, don de falar distintas linguas; a outro, o saber interpretar esas linguas. Pero todo isto é un e o mesmo Espírito quen o realiza, repartindo a cada un en particular, como a El lle parece.

Palabra do Señor

♪ 50 *Na tardiña baixa da vida* SALMO

(en pé) *Leccionario I C páx 173 Xn 2, 1-11 EVANXEO*

PROCLAMACIÓN DO SANTO EVANXEO SEGUNDO XOÁN

Daquela houbo un casamento en Caná de Galilea, e estaba alí a nai de Xesús. Tamén foi convidado Xesús e mailos seus discípulos ao casamento. Chegou a faltar o viño e a nai de Xesús díxolle:

- Non che teñen viño.

Replicoulle Xesús:

- Muller, que ten que ver iso comigo e contigo? Aínda non chegou a miña hora.

Súa nai díxolles entón aos servidores:

- Facede o que el vos diga.

Había alí seis tinas de pedra para as purificacións dos xudeus, que levaban ao pé de cen litros cada unha. E ordenoulles Xesús:

- Enchede de auga as tinas.

Eles enchéronas de todo.

Díxolles entón:

- Collede agora e levádelle a proba ao mestresala.

Eles levárona. E, cando o mestresala probou a auga volta viño, sen saber de onda viña (os servidores si que o sabían, que eles colleran a auga) falou co noivo e díxolle:

- Todo o mundo pon de primeiras o viño bo e, cando xa están bébedos, o máis cativo; ti, en troques, deixaches o viño bo para agora.

Foi así como fixo Xesús o primeiro dos signos en Caná de Galilea; manifestou a súa gloria, e creron nel os seus discípulos.

Palabra do Señor

(sentad@s) gardamos uns instantes de silencio para acoller a palabra no corazón





Moitas veces queixámonos, e con razón, pois son moitos os atrancos polos que pasa a nosa vida. Pero hoxe coa axuda do evanxeo que acabamos de escoitar queremos mirar para o que fan María e Xesús: son capaces de dar unha man.

E nós estamos dando unha man agora na Unidade Pastoral de Os Cotos participando nesta celebración. Tamén estamos dando unha man aos veciños e veciñas de A Palma e dende estas comunidades facémoslle entrega de algo máis de tres mil euros. Así Os Cotos facemos como fan María e Xesús con aqueles recién casados: damos unha man. Vale a pena.

(en pé)

PROFESIÓN DA FE

Celebrante: Neste encontro parroquial damos resposta da nosa fe, do noso querer ser solidarios, do noso querer dar unha man a todas as persoas que sofren e están desesperadas. Dicimos:

♪ *Creo, Señor, pero aumenta a miña fe*

Monitor/a:

Crede en Deus, Pai e Nai,
que ama a todos sen diferenza e que nos convida a facer
un mundo máis solidario e de irmáns?

Creo, Señor, pero aumenta a miña fe

Crede en Xesús,
que nos convida a seguir os seus pasos, e que nos quere
dando unha man transformando a soidade en compañía, a
tristura en ledicia, o desprezo en acollida?

Creo, Señor, pero aumenta a miña fe

Crede no Espírito Santo,
que nos alenta a colaborar, construíndo unha sociedade
que axude a vivir en paz e en igualdade?

Creo, Señor, pero aumenta a miña fe

Crede na igrexa
comunidade que necesita das nosas mans e dos nosos
compromisos?

Creo, Señor, pero aumenta a miña fe

ORACIÓN UNIVERSAL

Celebrante: *No teu camiño de axuda, atopamos, Xesús, a razón da nosa vida e a nosa felicidade plena.*

Dicimos:

SEÑOR, ALÉNTANOS A COMPARTIR

Monitor/a:

- ✓ Polos homes, mulleres, nenos e nenas que sofren as consecuencias da falta de pan e de paz. Oremos
- ✓ Pedimos por todas as persoas que viven dando unha man a cantos buscan dignidade sabéndose refuxiados. Oremos
- ✓ Pola nosa comunidade de Os Cotos, para que sexa o compartir, e non o ter, o raseiro polo que medimos aos demais. Oremos
- ✓ Por todos nós, para que aprendamos que o amor e a solidariedade son desexo de Xesús para vencer as soidades, as desesperanzas e os fracasos. Oremos
- ✓ Polas persoas que teñen responsabilidades nos gobernos, para que convertan o desacougo e a tristura en dignidade e esperanza. Oremos

Celebrante: *Grazas Señor porque hoxe acolles as nosas preocupacións e desexos axudándonos a vivir na responsabilidade de ser testemuñas do evanxeo dando unha man, Ti que vives e reinas por sempre eternamente. Amén*

3.- OS SIGNOS DA COMUÑÓN CON DEUS E COA COMUNIDADE

NOSO PAI

Celebrante: *Con total liberdade, comprometéndonos co Deus que é Pai, e querendo ser solidarios no pan de cada día, rezamos coma Xesús nos aprendeu*

NOSO PAI ...

SIGNO DA PAZ

Celebrante: *Non queremos un lugar de honor, sentímonos honrados na loita pola solidariedade e a igualdade. Neste momento desexamos que os máis esquecidos pola sociedade poidan percibir unha man de axuda na súa vida. E dende logo que a perciben cando as nosas mans fan ben. Vale a pena. Fagámolo.*

COMUÑÓN

Celebrante: *Xesús reúnenos arredor da mesa da Eucaristía para que o descubramos no pan compartido cos irmáns. Aquí é onde mellor podemos medrar no camiño de solidariedade que nos propón Xesús co seu exemplo.*

Ditosos nós que hoxe somos convidados a este pan do Señor.

Señor, eu non son merecente de que entres no meu fogar, mais unha palabra túa abonda para me salvar

🎵 **nº 55** **No colo da miña nai**

4.- AVISOS E DESPEDIDA

ORACIÓN FINAL

Celebrante:

Señor, seguros da túa bondade pedímosche que acollendo con fe as túas palabras sexamos capaces de dar froitos de paz e xustiza, e que os demais poidan contar coas nosas mans de irmáns.

Pedímoscho a Ti que vives e reinas con nós por sempre eternamente. Amén

O Señor está ao lado dos que precisan axuda, como os noivos do Evanxeo. Converte á súa preocupación e tristura en ledicia.

Hoxe son moitas as persoas que tamén precisan axuda, comprensión e amor.

Que os que intentamos ser cristiáns cribles non deixemos nunca de seguir o exemplo de Xesús dando unha man a quen precisa de nós.

Que teñamos un bo día, unha boa semana, e o Señor nos bendiga, † nos garde de todo mal e nos leve ao seu fogar de vida eterna. Amén.

Queremos amosar o noso agradecemento a todos os veciños e veciñas de Os Cotos porque entre todos conseguimos recaudar a importante cantidade de 3000 euros para facerlle chegar ás xentes de A Palma.

Entregaremos estes cartos a Cáritas de Tenerife que é unha de tantas mans que están querendo refacer a vida das familias que o perderon todo. Somos conscientes de que o camiño que teñen por diante non é doado, pero confiamos en que a nosa axuda sexa de proveito para alguén.

Así somos exemplo do que Xesús nos ensina no evanxeo de hoxe.

